

MAHINUNGDANONG MGA BUTANG PARA SA PAGPAHIULI SA IGLESIAHANONG KINABUHI

(Sabado—Sesyon sa Gabii)

Mensahe 6

Ang Kalabot sa Pagbatok sa Atong Natural nga Taras aron Motubo Ta sa Kinabuhi ug Magmapuslanon sa Pag-alagad

Basahong Kasulatan: Mat. 16:22-26; Gal. 2:20;
2 Cor. 1:8-9; 2:15; 3:3-6; 4:5; 5:20; Efe. 6:20

I. Batokan gyod nato ang atong natural nga taras aron motubo ta sa kinabuhi ug magmapuslanon sa pag-alagad:

- A. Ang atong natural nga taras nagpasabot sa pagkamao nato nga dala sa atong pagkahimugso, ug ang atong karakter mao ang pagpadayag sa atong natural nga taras; ang natural nga taras mao ang naa sa sulod sa atong pagkatawo, ug ang karakter mao ang gipadayag nato.
- B. Ang natural nga taras sa sulod ug ang karakter sa gawas mao ang pinuga, ang pagkamao, sa atong pagkatawo; ang kaugalingon sa sulod maoy atong natural nga taras, ug ang kaugalingon nga napadayag maoy atong karakter.
- C. Ang labing makadaot sa pagkamapuslanon nato sa Cristohanong kinabuhi ug iglesiahanong kinabuhi mao ang pagkinabuhi nato segun sa atong natural nga taras; kini ang tinuod nga kaaway sa pagtubo nato diha sa diosnong kinabuhi ug ang dakong butang nga makadaot sa pagkamapuslanon nato diha sa kamot sa Ginoo.
- D. Makat-on gyod unta ta sa pagtagad sa “bukolbukol” sa atong pagkatawo, sa atong natural nga taras; kon tagdon nato kining “bukolbukola,” dali ra tang motubo nga walay mga kaulangan sa atong pagtubo sa kinabuhi, ug labi sab tang magmapuslanon sa Ginoo.
- E. Gipasabot ang taras sa mga pamulong nga gigamit sa Mateo 16:23-26—*huna-huna, kaugalingon, ug kinabuhi-sa-kalag*; naglakip ning tanang elementoha ang taras; sa pagkatinuod, maingon nato nga ang atong natural nga taras mao ang atong kaugalingon.
- F. Ang pagbatok sa atong natural nga taras nagpasabot sa pagbatok sa atong kaugalingon, sa atong kinabuhi-sa-kalag (vv. 22-26), sa atong daang tawo (Rom. 6:6), ug sa “ako” (Gal. 2:20); unsa ka kamapuslanon sa Ginoo o unsa kadaghang kasamok ang mahimo nimo sa iglesia nag-agad sa pagpatay sa imong natural nga taras; ang paagi sa pagbatok sa atong natural nga taras pagkaamgo ug paghinumdom man nga mga tawo ta nga gilansang na sa krus ug magpabilin nianang pagkaamgoha ug realidara sa tibuok adlaw (v. 20; 5:24-25; Rom. 6:6; 8:13).
- G. Ang atong natural nga taras mao ang atong kaugalingon; naa kini nato, ug kita kini; kon praktikalon, ang pagdumili sa kaugalingon pagdumili lang sa atong natural nga taras; isip mga Cristohanon, magkinabuhi gyod ta ni Cristo sa mapadayonong paggamit nato sa atong espiritu aron isalikway ang atong kaugalingon ug magkinabuhi sa laing kinabuhi, sa gilansang sa krus ug nabanhawng Cristo, nga gitiman-an sa kahoy sa kinabuhi—Gen. 2:9; Fil. 1:21; Bug. 2:7; 1 Ped. 2:24; 1 Tim. 4:7-8.

II. Dili gyod ta magpalimiti sa atong natural nga taras diha sa buhat sa Ginoo; makat-on gyod unta hinuon ta nga magkinabuhi sa kinabuhing nagsupak sa atong kaugalingon, sa atong taras; bisan unsay naa nato ug bisan unsay mogula gikan nato dili mahimong dad-on nganha sa pag-alagad nato sa Ginoo—Rom. 1:9; 7:6; 2 Cor. 3:3-6; 4:5:

- A. Nagpakitag kusganong pagsalig-sa-kaugalingon ang natural nga disposisyon sa ubang brother; pukanon gyod ang ilang pagsalig-sa-kaugalingon sa mapadayonong pagsalikway nila sa ilang kaugalingon ug pagsalig sa nagbanhaw nga Tulo-usang Dios—1:8-9.
- B. Labi kagamay nga nahayagan sa Dios ang tawo, labi sab siyang maghunahuna nga makasugot siya sa Dios; labi kadali nga mopahayag ang tawo, labi sab kining nagpamatuod nga wala pa gyod siya sukad mobayad og bili; kadtong niingon konohay nga suod sila sa Dios malagmit maoy labing layo Kaniya—Mat. 6:1-6, 16-18; Luc. 18:9-14; Fil. 3:3.
- C. Ang natural nga taras sa pipila ka brother kana mang dili mobuhat basta dili hingpit ang mga sirkumstansya o dili ba maayo ang mga kahimtang; isalikway gyod nato ang natural nga taras nga nagkinahanglag unsang palibot ayha pa ta makabuhat—1 Ped. 4:1; 1 Cor. 9:23-27.
- D. Mobuhat gyod ta uban sa Dios pinaagi sa kinabuhing makapahaom sa tanang sitwasyon, makaantos sa bisan unsang pagtratar, makadawat sa bisan unsang palibot, makabuhat sa bisan unsang kahimtang, ug makagamit sa bisan unsang higayon, aron mobuhat sa pagpangalagad; kat-onan gyod nato ang sekreto sa pagsinati kang Cristo sa tanang butang ug sa tanang dapit—2 Cor. 6:1-2; Fil. 4:5-9, 11-13.
- E. Ang usa ka klase sa natural nga taras mao ang “pagkabayani;” kining matanga mobuhat gyod sa tanan sa paagi nga makadani, hingpit, ug kompleto; ang usa pa ka klaseng natural nga taras mao ang sa “dili-bayani;” dili maayo o kompletong mobuhat ang “dili-bayani.”
- F. Dunay nangakong mga igsoon nga kusganog elemento sa ilang natural nga taras nga nag-ulang nila sa pagpakigtambayayong ug pagbulig sa uban; sagad nga makahimo kaayo kini sila, ug dali ra sab kaayong makamugnag kasamok diha sa iglesiahonong kinabuhi; ang ilang taras dunay hunahuna man ngani tingali nga modominar, espiritung moduot, hinawayong pagpamulong, ug balaodnon ug dili mopasaylong espiritu.
- G. Ang ubang nangakong igsoon dunay natural nga taras tingali nga gustong ganahan ang tanan kanila ug dili gustong makasilo og tawo; makalimiti kini sa pagkaepektibo nila diha sa buhat sa Ginoo, kay sa dihang gusto mamulong ang Ginoo og matinud-anon o prangkang pulong sa pagbadlong o pagpasidaan sa mga balaan pinaagi nila, dili sila mobuhat niini—itandi sa Col. 1:27-29; 1 Tes. 5:12-13; 1 Cor. 10:5-13; Heb. 3:7-19; 12:25:
 - 1. Labot pa, kadtong naay ingon niana nga taras makapadayag mag “laing kalayo” sa natural nga pagbati ngadto sa mga balaan, bisan hangtod sa punto nga makulangan na sila sa hustong pag-ila ug hustong paglantaw sa pag-atiman nila sa iglesia, sa mga balaan, ug sa buhat—Lev. 2:11; 10:1-2; Num. 6:6-7; Fil. 1:9; 1 Ped. 2:25; 5:2; Heb. 13:17.
 - 2. Ang dakong bahin sa panaad sa Nasareo mao ang paggahin sa atong kaugalingon gikan sa pagkapatay nga gumikan sa natural nga pagbati (Num. 6:6-7); kanang walay dugos ang halad-nga-lugas nagpasabot sab nga diha ni Cristo walay natural nga pagbati o natural nga kamaayo—Lev. 2:11; Mat. 12:46-50; Mar. 10:18.

- H. Ang tinubdan sa bisan unsang pag-alsa diha nato mao ang natural nga taras sa mga tawong nalambigit; ang ambisyon sa posisyon (nga naggikan ni Satanas) maoy nag-unang elemento sa natural nga taras sa tanang hulog nga tawo; ang gigikanan sa pagsupak mao ang kaugalingon, ang natural nga taras—Isa. 14:12-13; Num. 12:1-2; 16:1-3; 1 Sam. 15:10-12; Mat. 18:1-4; 20:20-28; Luc. 22:25-27; 2 Cor. 10:4-5.
- I. Giasoy sa 2 Mga Hari 4:8-10 ang pag-abiabi sa babayeng Shunamitanhon ni Eliseo sa paghatag kaniyang makaon matag panahon nga moagi siya; wala siya momensahe o mobuhat bag milagro, apan nakaila ang babaye nga “balaang tawo sa Dios” siya tungod sa kinan-an niya; kini ang impresyon sa uban ni Eliseo, busa pangutan-on gyod nato ang atong kaugalingon, “Unsa may impresyon sa uban kanato?”—itandi sa 2 Cor. 2:15; 5:20; Efe. 6:20.
- J. Kon dugmokon sa Ginoo ang atong tawo sa gawas lakip ang atong natural nga taras, dili na nato ikapakita sa uban ang kusganong kaugalingon nato inigkontak nato nila; moagay hinuon ang atong espiritu inigkontak nato sa mga tawo; dili gyod nato madaog ang mga problema sa atong natural nga taras, apan makahimo niini ang Ginoo—Juan 7:37-38; Luc. 18:24-27; 19:2.

III. Gibatokan sa Espiritu ang atong tawo sa gawas, atong kaugalingon, atong natural nga taras, pinaagi sa makapatayng elemento sa krus nga naa sa nasagol nga Espiritu, sa pagdisiplina sa Espiritu, sa paghayag ni Cristo nga Espiritu, ug sa iglesihanong kinabuhi, pagpamunga, ug pagpakaon-sa-nating-karnero:

- A. Aron mabatokan ang atong natural nga taras, dumilian gyod nato ang kaugalingon ug iaplikar ang makapatay nga gahom sa krus; makakita ug makaamgo gyod unta ta sa atong pagsinati nga ang nasagol, malangkobon-sa-tanan nga Espiritu nga naa sa atong espiritu naglakip sa bililhong kamatayon ni Cristo ug sa katam-is ug pagkaepektibo niini, nga makapatay sa natural nga taras nato—Exo. 30:23-25; Fil. 1:19; Rom. 8:13:
 - 1. Si Cristo nga nasagol nga Espiritu maoy tambal nga moayo nato, mobuhi nato, ug mopatay sa tanang negatibong butang sa sulod nato; dawaton ngani nato Siya ingon nga tambal nato, mapahimuslan nato ang “pagpatay kang Jesus”—2 Cor. 4:10-11.
 - 2. Naa sa Espiritu ang makapatay nga elemento sa krus; isalikway ngani nato ang atong kaugalingon sa buntag aron dawaton ang Dios nganhi nato, mabati nato sa tibuok adlaw ang kahikayan sa pagpatay sa sulod nato.
- B. Ang tumong sa pagdisiplina sa Espiritu Santo aron man madugmok ta; ibutang gyod ta sa Dios sa dapit sa hingpit nga pagkainutil ug pagkawalay-mahimo ayha pa Siya makabuhat sa sulod nato; ang tuyo sa mga pagsulay nga nasinati nato aron man madawat nato ang kaayohan nga makaila sa Dios aron mapadayag Siya—1:8-9; 12:9-10; Isa. 40:28-31; Os. 6:1-3:
 - 1. Ang pagdugmok sa tawo sa gawas pagdugmok man sa atong natural nga taras; maglisod ta sa pagpagula sa atong espiritu tungod sa natural nga taras nato; ang tawong wala madugmok sa Dios dili mapiyalan sa buhat sa Ginoo; unsa ta sa sinugdan, lakip na ang natural nga panagway ug lami nato, dili gyod mahiangay sa Dios ug dili bagay Niya—Jer. 48:11.
 - 2. Bisan unsa ta sa pagkahimugso nato, maayo ba o daotan, mapuslanon ba o dili, natural man ug hingpit gyong makaulang sa pag-umol sa Espiritu Santo sa diosnong kinabuhi nganhi sa atong pagkatawo; tungod niini gub-on gyod ang atong natural nga kusog, natural nga kaalam, natural nga kaigmat, natural

nga taras, natural nga mga kakulangon, natural nga maayong kagawian, ug ang atong karakter ug mga batasan, aron maporma sa Espiritu Santo sa sulod nato ang bag-ong taras, bag-ong karakter, bag-ong mga batasan, bag-ong maayong kagawian, ug bag-ong mga kaayo.

3. Aron mahuman ang buhat sa pag-umol pag-usab, naglihok ang Espiritu Santo sa Dios sa sulod nato para hayagan ta, dasigon, giyahan, ug suropan sa diosnong kinabuhi; nagbuhat sab Siya sa atong palibot aron ipahaluna ang matag detalye, tawo, hitabo, ug butang sa atong sitwasyon para gub-on ang tanang aspeto sa atong natural nga pagkatawo aron ipasama ta Niya sa dagway ni Cristo nga panganayng Anak sa Dios—Rom. 8:28-29.
 4. Gisukod sa atong Dios kanato ang tanang naa sa atong palibot; gipahaluna Niya ang tanang naglibot nato, ug ang bugtong tuyo niini mao ang pagdugmok sa tataw kaayo, walay pagbati, ug gahing mga bahin nato—Sal. 39:9; Mat. 10:29-30; Luc. 8:28-29.
 5. Kon dili madugmok ang tawo sa gawas, dili makagula ang tawo sa sulod; dugmokon gyod ang kulonong sudlanan ayha pa makagula ang bahandi (2 Cor. 4:7); basta naa pa sa alabastrong kahon ang igdihog, dili makagula ang kahumot (Juan 12:3).
 6. Dili makapasakop sa uban ang tawong wala madugmok; kadto rang nakasinati ni Cristo nga ilang kinabuhi sa pagpasakop ang nakaila sa pagkamasupilon sa ilang natural nga taras—Fil. 2:5-8.
 7. Wala pa madugmok ang tawong mapagarbohon, wala pa madugmok ang tawong mobasol sa uban, wala pa madugmok ang tawong nagtuo nga si-kinsa siya nga sa pagkatinuod balewala diay siya, ug wala pa madugmok ang tawong nakigkompetensya sa uban—3:3; 1 Cor. 6:7; Gal. 5:25; 6:3.
 8. Hilaw pa, ihalas, ug dili magamit sa Dios ang tawong wala pa sukad iduot, wala dagmali, gitamay, o gipasipad-an ba sa uban; dili gyod ta magbaton sa sayop nga hunahuna nga daygon ug tahoron ta sa tanang balaan tungod kay gipadala ta sa Dios, gitawag sa Dios, ug gipiyalan sa Iyang buhat; ang tawong nitahod nato karong adlawa mobiyabiay ug moyatak tingali nato ugma; kini ang dalan sa tawong nag-alagad sa Ginoo.
- C. Ang pagkahigawas gikan sa atong natural nga taras naggikan sab sa paghayag sa sulod ni Cristo nga dakong kahayag; kining paghayaga pagkakita man sa nakita sa Dios—Prov. 4:18; 20:27; Sal. 18:28-29; Mat. 4:16; Luc. 11:34-36; Buh. 9:3-5; 22:6-10; 26:13-19; Efe. 5:13; Fil. 2:15-16:
1. Ang kinadak-ang butang sa Cristohanong pagsinati mao ang pagpatay nga naggikan sa paghayag sa diosnong kahayag; ang paghayag mao ang pagluwas, ug ang pagkakita mao ang pagkahigawas; tanang tinuod nga nakakitag panan-awon sa Ginoo diha sa Iyang himaya nahayagan diha sa iyang konsensya kalabot sa iyang pagkahugaw—Isa. 6:1-8.
 2. Gihayagan ta pag-ayo sa Ginoo aron ibutyag ug ipaubos ta; kining paghayaga ray makakuha sa atong garbo, ug kining kahayaga ray makapahunong sa unodnong mga kalihokan nato ug modugmok sa atong kaha lakip na sa atong natural nga taras; labi tang makakita sa Dios, makaila sa Dios, ug mahigugma sa Dios, labi sab natong ayran ug dumilian ang atong kaugalingon—Job 42:5-6; Mat. 16:24; Luc. 9:23; 14:26.
 3. Dili gyod ta mosulay nga magpadako sa atong kasingkasing o magmapalibon ba sa pagpaningkamot sa atong kaugalingon, sa atong natural nga taras; makat-on unta hinuon ta nga mohapa diha sa kahayag sa Dios, moadawat sa Iyang pagdugmok, ug magpadugmok ug magpaguba sa palibot.

- D. Kon dili ta mapuslanon diha sa kamot sa Ginoo sa pag-atiman sa mga tawo, tungod kini sa atong natural nga taras; ang iglesiahanong kinabuhi, pagpamunga, ug pagpakaon-sa-nating-karnero mao ang tulo ka butang nga mopatay sa atong natural nga taras; aron mabatokan ang atong natural nga taras, mahigugma gyod ta sa Dios sa pagkontak nato Kaniya aron matuhopan Niya nga grasya, ug mahigugma gyod ta sa mga tawo sa pagkontak nato kanila aron patuhopan sila sa Dios nga grasya—Juan 21:15-17; Efe. 3:2; 4:29; 1 Ped. 4:10.

IV. Ang pagtagad sa Dios ni Jacob hingpit nga hulagway man sa pagdisiplina sa Espiritu Santo ug sa buhat Niya sa pagtransporma diha sa mga magtutuo sa Bag-ong Tugon aron mabatokan ang ilang natural nga taras ug maporma si Cristo diha nila, hingpit nga motubo diha nila, hangtod mahamtong sila; kini ang pagpanalangin sa Dios kanato ug paghimo kanatong panalangin ngadto sa uban aron masangkapan sila sa diosnong pagpaambit sa Diosnong Trinidad—Rom. 12:2; 2 Cor. 3:18; Heb. 6:1; Gen. 12:1-3; Ezeq. 34:26; Num. 6:22-27:

- A. Nagpakita ang kinabuhi ni Jacob nga mosinati gyog pagdugmok ang natural nga tawo aron mahimong Israel, prinsipe sa Dios; ang giguba sa Dios pinaagi sa atong palibot mao ang atong kaugalingon nga walay pulos, ang atong natural nga taras; apan ang gitukod sa Dios nganhi nato mao ang Iyang Kaugalingon, ang dili hitupngan, labaw sa tanan, ug walay kinutobang Dios—1 Cor. 3:12.
- B. Gitudlo sa Dios si Jacob nga magkinabuhi nga makigbisog sa tanang adlaw niya; mabut-anon Niyang gipahaluna ang matag sirkumstansya, sitwasyon, ug tawo sa kinabuhi ni Jacob ug usang gipabuhat kining tanan alang sa ikaayo ni Jacob aron matransporma Niya si Jacob, nga mangingilog ug tiggupot-sa-tikod, ug ma-Israel, prinsipe sa Dios—Gen. 25:26; 32:24-32.
- C. Ang labing kusganong pagpadayag sa pagkahamtong ni Jacob sa kinabuhi (ang kataposang hugna sa pagkatransporma) mao ang kamatuoran nga gipanalanginan ni Jacob ang tanan; nahimong mga kamot nga nagpanalangin ang mga kamot nga nangilog; ang panalangin mao ang pag-awas sa Dios nga kinabuhi ngadto sa uban pinaagi sa pagkahamtong sa kinabuhi—47:7, 10; 48:14-16; 49:1-28.